

光緒辛巳年重修

惠州府志

三

惠郡城北文昌宮藏板

惠州府志卷四十四

人物十六

仙釋

朱靈芝其先大宛人也後徙北谷師事太素真人受青精
飪飯方餌之能一日九食亦能終歲不饑棄捐妻孥南
來羅浮隱居修煉太清神丹九鼎功成日嚙一銖內視
服氣者三十五年五色鳥銜赤芝取而茹之初無名字
人稱青精先生至是因名靈芝復得玉珮金璫之道禮
華蓋隱元之星叱咤風雷攝召鬼神積行樹功累德增
善乃白日昇天而去膺受圖籙爲太極仙鄉治朱明耀
真洞天其棲息處有朱子庵又有朝斗壇焉

華子期淮南人師事角里先生授隱仙靈寶方書一曰伊洛飛龜秩二曰伯禹正機三曰平衡方按合服之漸還少壯日行五百里力舉千斤一歲十二易其形後仙去居羅浮受命治泉源福地

梁盧安定人嘗爲曹掾棄之行默朝三元之法太清真人教以神丹使往名山擇明秀產靈物者居之丹乃可成盧聞羅浮本出蓬島乃自會稽南行三十里居觀源洞尋藥修煉丹成仙去

王佐字子陽太原祁人少知長生之道入中嶽遇武陵黃敬授以訣曰天關之中有輔星想而見之翕習成赤童在焉持朱庭指而搖之煉身形消遣三尸除死名審能

守之可長生失之不久淪幽冥佐受而行之南來遯居
羅浮內修九年與梁盧爲友皆能變形隱化往來蓬萊
後俱飛昇

葛洪字稚川丹陽句容人也性寡欲無所愛翫不好榮利
閉門却掃逕究覽典籍尤好神仙導養之法從祖元吳
時學道得仙號曰葛仙翁以其煉丹秘術授弟子鄭隱
洪就隱學悉得其法焉後師事南海太守上黨鮑元元
亦內學逆占將來見洪深重之以女妻洪洪傳元業兼
綜練醫術凡所著撰皆精覈是非而才章富贍太平安
石冰作亂洪爲將兵都尉冰平洪不論功賞徑至洛陽
欲搜求異書以廣其學洪見天下已亂欲避地南土會

譙國稽含見用爲廣州刺史乃表請洪爲參軍見遣先行催兵而含於後遇害遂停廣州類爲節將見邀用皆不就以年老欲煉丹以祈遐壽聞交趾出丹求爲勾漏令帝以洪資高不許洪曰非欲爲榮以有丹耳帝從之洪遂將子姪俱行至廣州刺史鄧嶽畱不聽去洪乃止羅浮山煉丹在山積年優游閑養著述不輟其自序曰洪體乏進趣之才偶好無爲之業假令奮翅則能凌厲元霄騁足則能追風躡景猶欲戢勁翮於鷦鷯之羣藏逸跡於跛驢之伍豈況大塊稟我以尋常之短羽造化假我以至驚之蹇足自卜者審不能者止又豈敢力蒼蠅而慕沖天之舉策跛鼃而追飛兔之軌飾嫫母之鵠

陋求媒陽之美談推沙礫之賤質索千金於和肆哉夫
焦僥之步而企及夸父之蹤近才所以噴礙也要離之
羸而強赴扛鼎之勢秦人所以斷筋也是以望絕於榮
華之途而志安乎窮圯之域藜藿有八珍之甘蓬蓽有
藻稅之樂也故權貴之家雖咫尺弗從也知道之士雖
艱遠必造也考覽奇書旣不少矣率多隱語難可卒解
自非至精不能究自非篤勤不能悉見也道士宏博洽
聞者寡而意斷妄說者眾至於時有好事者欲有所修
爲倉卒不知所從而意之所疑又無足諮今爲此書粗
舉長生之理其至妙者不得宣之於翰墨蓋粗言較畧
以示一隅冀排憤之徒省之可以思過半矣豈謂闔塞

必能窮微暢遠乎聊論其所先覺者耳世儒徒知服膺
周孔莫言神仙之書不但大而笑之又將謗毀直正故
予所著子言黃白之事名曰內篇其餘駁難通釋名外
篇大凡內外一百一十六篇雖不足藏諸名山且欲緘
之金匱以示識者自號抱朴子因以名書其餘所著碑
誄詩賦百卷移檄表章三十卷神仙良吏隱異集等傳
各十卷又鈔五經史漢百家之言方技雜事三百一十
卷金匱藥方一百卷肘後要急方四卷洪博聞深洽江
左絕倫著述篇章富於班馬又精辯元頤析理入微後
忽與嶽疏云當遠行尋師尅期便發嶽得疏狼狽往別
而洪坐至日中兀然若睡而卒嶽至遂不及見時年八

十一視其顏色如生體亦柔軟舉尸入棺甚輕如空衣
世以爲尸解得仙云

鮑靚字太元東海人也年五歲語父母云本是曲陽李家
兒九歲墜井死其父母尋訪得李氏推問皆符驗靚學
兼內外明天文河洛書稍遷南陽中部都尉爲南海太
守嘗行部入海遇風饑甚取白石煮食之以自濟王機
時爲廣州刺史入厠忽見二人着烏衣與機相捍良久
禽之得二物似烏鵲靚曰此物不祥機焚之徑飛上天
機尋誅死靚行龍山見前一少年姿容整茂徒行甚徐
而遠去殊疾靚乘名馬逐數里終不能及意甚異之及
問少年答曰我中山陰長中也

黃野人葛仙弟子或云葛仙之隸稚川棲山煉丹野人隨之葛既仙去畱丹柱石間野人自外至得一粒服之爲地行仙近有人遊羅浮宿畱巖谷間中夜見一人身無衣而紺毛覆體意必仙也乃再拜問道其人了不顧但長嘯數聲響振林木歌詩云雲來萬嶺動雲去天一色長嘯兩三聲空山秋月白咸淳中客有戴烏方巾著鞞往來羅浮山中見人則大笑反走三年不言姓名他日醉歸忽取煤書壁云雲意不知滄海春光欲上翠微人間一墮千劫猶愛梅花未歸

單道開敦煌人也常衣麤褐或贈以繒服皆不着不畏寒暑晝夜不臥恒服細石子一吞數枚日一服或多或少

好山居而山樹諸神見異形試之初無懼色石季龍時
開從西平來一日行百里其一沙彌年十四行亦及之
至秦州表送到鄴季龍令佛圖澄與語不能屈也自云
能療目疾就療者多驗視其行動狀若有神佛圖澄曰
此道士觀國興衰若去者當有大亂及季龍末道開南
渡許昌尋而鄴中大亂升平三年至京師後至南海入
羅浮山獨處茅茨蕭然物外年百餘歲卒於山舍勅弟
子以尸置石穴中弟子乃移入石室陳郡袁宏爲南海
太守與弟穎叔及沙門支法防共登羅浮山至石室口
見道開形骸如生香火瓦器猶存宏曰法師業行殊羣
正當如蟬蛻耳乃爲之贊云

唐子西贊曰世人茹柔剛則吐之匙炒爛飯牛口如

飼至人忘物剛柔一致其視食石如啗餅餌北平飲羽
出於無心食石之理於此可尋我雖不能而識其理庶
幾漱之而礪厥齒蘇軾書單道開傳後云葛稚川與
單道開皆西晉人而生於東晉又皆隱於羅浮使稚川
見道開必有述焉而地朴內篇皆不及道開豈稚川化
時道開尚未至羅浮也稚川乞勾漏令游南海遂入羅
浮按本傳在升平三年以後相去蓋三十餘年必稚川
先化也紹聖元年九月予至羅浮問山中人則道開無
復遺跡矣亦不知石室所在獨書此傳
遺冲虛觀道士鄧守安以備山中逸事

蘇元朗不知何許人嘗學道於句曲得司命真秘遂成地

仙仙生於晉太康時隋開皇中來遊羅浮年已三百餘
歲矣居青霞峇修煉大丹自號青霞子作太清石壁記
及所授茅君歌又發明大易丹道爲寶藏論子弟從遊
者聞朱真人服芝得仙競論靈芝春青夏赤秋白冬黑
惟黃芝獨產崧高遠不可得元朗笑曰靈芝在汝八景

中盍向黃房求諸諺云天地之先無根靈草一意制度
產成至寶此之謂也乃著旨道篇示之自此道徒始知
內丹矣又以古文龍虎經周易參同契金碧潛通秘訣
三書文繁義隱乃纂爲龍虎金液還丹通元論歸神丹
於心煉內視九年冲舉而去谷中有伏虎石存焉嘉靖
中土人耕治其地猶得銅盃一古劍一竟毀之

許碯自稱高陽人累舉不第學道王屋山周遊五嶽武彝
霍童羅浮無不徧歷所至皆於懸崖峭壁人跡不及處
題云碯自峨嵋山尋偃月子到此觀者異之常醉吟曰
聞苑花前是醉鄉踏翻王母九霞觴羣仙指點嫌輕脫
謫向人間作酒狂

司馬退之河內人道行高潔博覽工詩居長安爲道士元
宗命往羅浮採藥住沖虛觀嘗賦洗心詩爲人傳誦久
之得藥乃還京師

蔡天一不知何許人爲羅浮道士天寶九載於都虛觀齋
曾有五色雲起麻姑臺仙女縹緲而出識其爲何仙姑
也因爲作傳大厯間天一於會仙觀左立仙姑祠事聞
代宗賜仙姑朝霞帔一襲

王錫者羅浮道士嚙煉五牙返還天谷人多師之猶不自
足往來名山尋師由是爲時所重曹唐有送羽人王錫
歸羅浮詩唐字堯賓桂林人嘗爲道士太和中舉進士
中第屢爲諸府從事以暴疾卒於家人以爲羽化蓋錫

與唐友皆一時奇士也

曹唐送羽人王錫歸羅浮詩風前整頓紫荷巾常向羅浮保養神石磴倚天行帶月鐵橋通海入無塵龍蛇出洞閑邀雨犀象眠花不避人最愛葛洪尋藥處露苗烟蕊滿山春

羅萬象不知何許人有文學明天文通周易節操奇特遊行天下至黃屋山後入羅浮愛石樓之景乃結廬以居嘗餌黃精殮霞服氣數十年或一食則兼數十人或一食則莫知歲月光悅輕健日行三四百里奔馬莫及歸隱石樓不復出

劉瞻小字宜哥桂陽人唐宰相瞻之兄也家貧好道嘗有道士經其家見瞻異之間知道否曰知之某性饒裕氣業應未淨遽可強學邪道士曰能相師乎曰何敢於是

師事之道士曰山棲求道無裹巾瞻遂了髻布衣隨入
羅浮山初與兄瞻俱讀書爲文而瞻性惟高尚瞻性慕
榮達瞻嘗謂瞻曰鄙必不第則逸於山野爾得第則勞
於塵俗不及鄙也然慎於富貴四十年後當驗矣瞻曰
神仙遐遠難求秦皇漢武非不區區也廊廟咫尺易致
焉自後瞻精思於道乃隱於羅浮瞻進士登科屢歷清
顯及升輔相頗著變調之稱俄謫日南行次廣州朝臺
泊舟江濱忽有了角布衣少年衝暴雨而來衣履不濕
欲見瞻左右皆訝乃詰之但言宜哥來也以白瞻問形
狀具以對瞻驚歡迎人見之瞻顏貌可二十來瞻已皤
然衰朽爲逐臣悲喜不勝瞻復勉之曰與余爲兄弟手

足所痛曩日之年今四十年矣瞻亦感歎謂瞻曰可復修之否瞻曰身邀榮寵職和陰陽用心動靜能無損乎自非茅家阿兄已昇天仙詎能救爾今惟來相別非來相敘也於是同舟行話別平生隔闕之事一夕失瞻所
在今羅浮山中時有見者瞻遂南行卒於貶所矣

侯道華芮城人初在河東爲永樂縣道士遊羅浮遇異人傳錄龍虎丹訣遂得道復入義嶠山去先是永樂有無核棗蘇氏女子啖之遂不穀食却老後經亂離莫知其所在而道華亦得啖其一云

黃勵大有末官禎州刺史時高祖淫刑峻法勵棄官入羅浮山築書院於水簾洞左居焉久之聞雲華野人之名

亦自號黃野人嘗逢仙真指授丹法修煉得道時時服黃衣繫阜條腰懸玉瓢遇病者投以藥輒效

厲歸真唐末爲道士遊洪都信果觀見三官殿功德塑像有明皇詔以夾紵製作甚妙然主者不甚寶護常多雀鴿糞穢點污歸真遂於壁畫一鶴以此雀鴿無復棲止後有人見歸真於羅浮登仙

暨濟物字子虛隨朱法師入太滌山剏垂象樓三間積書千卷以著述爲事每講貫元學聞者歎服錢氏王吳越欲爲賜度弟子對曰樂靜久矣不願有之每語人云吾不久在羅浮石樓矣一旦不知所之

胡衍號雲峯其先廬陵人宋初行醫至博羅遂居焉少慕